

Headline
Date
Media Title
Section
Circulation
Readership

IPT apex diumumkan dalam bajet
27. Aug 2008
Berita Harian
Nasional
217920
2083000

Language
Page No
Article Size
Frequency
Color
AdValue

MALAY
13
112 cm2
Daily
Full Color



IPT apex diumumkan dalam bajet

Hanya sebuah universiti dipilih perintis program

Oleh Syuhada Choo Abdullah
choo@bharian.com.my

SERDANG: Perdana Menteri, Datuk Seri Abdullah Ahmad Badawi, akan mengumumkan sebuah universiti terpilih merintis program apex yang bakal melonjakkan kecemerlangannya sehingga ke peringkat antarabangsa, pada pembentangan Bajet 2009, Jumaat ini.

Menteri Pengajian Tinggi, Datuk Seri Mohamed Khaled Nordin, berkata ia adalah harapan kementerianya selepas menyenarai pendek empat daripada sembilan universiti yang memohon pemilihan untuk program landasan pantas itu.

Beliau berkata, universiti dikenal pasti itu akan bertanggungjawab mencapai kedudukan 200 institusi pengajian tinggi (IPT) terbaik dunia menjelang 2010 dan dalam lingkungan tangga 50 teratas pada 2020 seperti sasaran Pelan Strategik Pengajian Tinggi Negara (PSPTN).

"Universiti itu akan memulakan satu perjalanan transformasi ke arah menjadi elit. Satu perjalanan yang mencabar bagi universiti," katanya selepas menyampaikan amanat kemerdekaan Kementerian Pengajian Tinggi di Universiti Putra Malaysia (UPM) di sini, semalam.

Akhbar sebelum ini melaporkan sembilan universiti yang memohon pemilihan program apex meliputi tujuh IPT awam (IPTA) dan dua swasta (IPTS) dan daripada jumlah itu, kementerian menyenarai pendek empat universiti penyelidikan, iaitu Universiti Malaya (UM), Universiti Kebangsaan Malaysia (UKM), Universiti Sains Malaysia (USM) serta UPM.

Ketika ini, Mohamed Khaled berkata, lima universiti tempatan iaitu UM, USM, UKM, UPM dan Universiti Teknologi Malaysia (UTM), berada dalam kedudukan 500 universiti terbaik dunia hasil penarafan Times Higher Education Supplement (THES).

Walaupun ada 30,000 universiti di seluruh dunia, beliau berkata, kerajaan ingin



“Kita tidak khuatir untuk dinilai mana-mana sistem yang diwujudkan negara lain walaupun kriterianya pelbagai dan berbeza”

Mohamed Khaled Nordin
Menteri Pengajian Tinggi

memperbaiki kedudukan universiti tempatan dalam penarafan antarabangsa dan pada masa sama turut memberi penekanan kepada sistem penilaian diperkenalkan kementerian, iaitu Setara.

"Meskipun kita ada sistem sendiri, kita bersedia untuk dinilai supaya tahu kedudukan kita (pada peringkat antarabangsa)," katanya.

Mengenai amanat kemerdekaan yang disampaikan, Mohamed Khaled berkata, pelajar di universiti sebagai golongan yang matang, berilmu serta berpendidikan tinggi, harus memahami kepentingan perpaduan dan saling menghormati rakyat berbilang kaum di negara ini.

Katanya, beliau tidak menerima laporan mengenai sebarang masalah seperti perselisihan atau pergaduhan antara pelajar berlainan kaum di kampus.

Pada majlis sama, Mohamed Khaled selaku Pengerusi Yayasan Tunku Abdul Rahman (YTAR) turut menyampaikan Biasiswa YTAR 2008 kepada 50 pelajar dari IPTA dan IPTS seluruh negara.